

liberdade de ser e sentir!

28 de xuño
día da diversidade sexual

Manifiesto campaña LIBERDADE DE SER E SENTIR!

ACTO CONMEMORATIVO

Desde a provincia da Coruña queremos unirnos á conmemoración do Día Internacional do Orgullo LGTBQIA+, unha xornada para reivindicar a diversidade, a igualdade e os dereitos de todas as persoas, independentemente da súa orientación sexual, identidade ou expresión de xénero.

Alzamos a nosa voz dende todos os recunchos da nosa provincia para celebrar e pelexar a DIVERSIDADE. Desde as aldeas aos barrios das nosas vilas, a realidade das persoas lesbianas, gais, bisexuais, trans, cuir, intersexuais, asexuais e doutras identidades disidentes está presente, viva, e esixe ser recoñecida e respectada.

A loita do colectivo LGTBQIA+ non é só unha loita polo recoñecemento legal, senón tamén unha loita por vivir con dignidade, sen medo, sen violencia e sen discriminación. É unha loita pola liberdade de ser, estar e existir.

Lembramos con orgullo a **memoria** das que abriron camiño, e tamén denunciaremos as múltiples formas de violencia, exclusión e invisibilización que aínda persisten. Este día é tamén unha homenaxe ás persoas que nos precederon e que, desde a valentía

e a resistencia, abriron camiño para que hoxe sigamos avanzando cara a unha sociedade máis xusta e inclusiva.

Porque ante o auxe dos discursos do odio LGTBfóbicos debemos traballar para que as nosas aldeas, barrios e parroquias sexan un referente onde se garantan espazos seguros, libres e igualitarios para todas as persoas.

Desde as institucións públicas temos a responsabilidade de garantir os dereitos de todas as persoas e de traballar para eliminar as discriminacións que aínda persisten. A diversidade é unha riqueza que debemos protexer e celebrar, non un motivo de exclusión.

Comprometémonos, a seguir promovendo políticas públicas que aseguren espazos seguros e libres de lgtbifobia, que aposten pola educación en valores de igualdade e respecto, e que dean visibilidade á pluralidade das vivencias e realidades LGTBQIA+.

Sabemos que queda camiño por percorrer, e que a igualdade legal non sempre garante a igualdade real. Por iso, hoxe reafirmamos o noso compromiso coa liberdade, coa diversidade e coa xustiza social.

O día de hoxe, e ao longo de todo o ano, reivindicamos:

- O dereito a vivir con dignidade e liberdade, en calquera aldea, parroquia, barrio ou concello da provincia.
- Servizos públicos que recoñezan e atendan a diversidade afectivo-sexual e de xénero.
- Un ensino galego, laico, inclusivo e con educación afectivo-sexual real e respectuosa.
- A aposta decidida das institucións coruñesas, desde os concellos ata a Deputación, pola igualdade efectiva e pola loita contra os discursos de odio.
- A visibilidade do colectivo LGTBQIA+ na cultura, nos medios, no deporte, no rural e en todos os espazos sociais.

Reivindiquemos un Orgullo crítico, que sexa festa, pero tamén memoria e resistencia. Non é só bandeiras nas rúas unha vez ao ano, senón compromiso diario coa diversidade e coa igualdade real.

Queremos construír unha sociedade onde todas as identidades e orientacións sexuais teñan cabida, recoñecemento e protección.

Unha terra onde ninguén teña que marchar para vivir libremente.
Unha Galicia orgullosa de ser diversa.

Por unha Galicia diversa, respectuosa e libre. Sen medo, sen
armarios, sen odio.

Porque todos os corpos, todas as identidades e todas as formas
de amar merecen ser celebradas. Porque non hai democracia
plena sen igualdade real.

Hoxe, máis ca nunca, con orgullo. Con memoria. Con compromiso
reivindiquemos a LIBERDADE DE SER E SENTIR!

28 de xuño de 2025